

四庫全書

經部

欽定四庫全書

釋名卷二

漢 劉熙 撰

釋州國

青州在東取物生而青也州注也郡國所注仰也徐
州徐舒也土氣舒緩也揚州州界多水水波揚也
荊州取名於荊山也必取荊為名者荊警也南蠻數為
寇逆其民有道後服無道先彊常警備之也豫州地

在九州之中京師東都所在常安豫也

涼州西方所

在寒涼也

雍州在四山之內雍翳也

并州曰土無

也其州或并或設故因以為名也

幽州在北幽昧之

地也

冀州亦取地以為名也其地有險有易帝王所

都亂則冀治弱在冀強荒則冀豐也

兗州取兗水以

為名也

司州司隸校尉所主也

益州益阨也所在

之地險阨也

古有營州齊衛之地於天文屬營室取

其名也

燕宛也北方沙漠平廣此地在涿鹿山南宛

宛然以為國都也 宋送也地接淮泗而東南傾以為
殷後若云滓穢所在送使隨流東入海也 鄭町也其
地多平町町然也 楚辛也其地蠻多而人性急數有
戰爭相爭相害辛楚之禍也 周地在岐山之南其山
四周也 秦津也其地沃衍有津潤也 晉進也其土
在土有事於中國則進而南也又取晉水以為名其水
迅進也 趙朝也本小邑朝事於大國也 魯魯鈍也
國多山水民性樸魯也 衛衛也既滅殷立武庚為殷

後三監以守衛之也 齊齊也地在渤海之南勃齊之

中也 吳虞也太伯讓位而不就歸封之於此虞其志

也 越夷蠻之國也度越禮義無所拘也此十三國上

應列宿各以其地及於事宜制此名也至秦改諸侯置

郡縣隨其所在山川土形而立其名漢就而因之也

河南在河之南也 河內河水從岐山而南從雷首而

東從譚首而北郡在其內也 河東在河水東也 河

西在河水西也 上黨黨所也在山上其所最高故曰

上也 潁川因潁水為名也 汝南在汝水南也 汝

陰在汝水陰也 東郡南郡皆以京師方面言之也

北海海在其北也 西海海在其西也 南海在海南

也宜言海南欲同四海名故言南海 東海海在其東

也 濟南濟水在其南也 濟北濟水在其北也義亦

如南海也 濟陰在濟水之陰也 南陽在國之南而

地陽也凡若此類郡國之名取號於此則其餘可知也

縣邑之名亦如之 大曰邦邦封也封有功於是也

國城曰都者國君所居人所都會也 周制九夫為井
其制似井字也四井為邑邑猶悒也邑人聚會之稱也
四邑為丘丘聚也 四丘為甸甸乘也出兵車一乘也
鄙否也小邑不能遠通也 縣懸也懸係於郡也
郡羣也人所羣聚也 五家為伍以五為名也又謂之
鄰鄰連也相接連也又曰比相親比也 五鄰為里居
方一里之中也 五百家為黨黨長也一聚之所尊長
也 萬二千五百家為鄉鄉向也衆所向也

釋形體

人仁也仁生物也故易曰立人之道曰仁與義 體第
也骨肉毛血表裏大小相次第也 軀區也是衆名之
大總若區域也 形有形象之異也 身伸也可屈伸
也 毛貌也冒也在表所以別形貌且以自覆冒也
皮被也被覆體也 膚布也布在表也 肌慤也膚幕
堅慤也 骨滑也骨堅而滑也 胾枝也似水之枝格
也 肉柔也 筋力也肉中之力氣之元也靳固於身

形也 膜幕也幕絡一體也 血滲也出於肉流而滲

滲也 膿醲也汁醲厚也 汁涕也涕涕而出也 津

進也汁進出也 洊澤也有潤澤也 汗澤也出在於

表澤澤然也 髓遺也遺瀝也 髮拔也拔擢而出也

鬢峻也所生高峻也 髦冒也覆冒頭頸也 眉媚也

有斌媚也 頭獨也於體高而獨也 首始也 面漫

也 額鄂也有垠鄂也故幽州人則謂之鄂也 角者

生於額角也 頤鞍也偃折如鞍也 目默也默而內

識也 眼限也童子限限而出也 睫挿接也挿於眼
眶而相接也 瞳子瞳重也膚幕相裏重也子小稱也
主謂其精明者也或曰眸子眸冒也相裏冒也 鼻嚙
也出氣嚙嚙也 口空也 頰夾也兩旁稱也亦取挾
斂食物也 舌泄也舒泄所當言也 齒始也少長之
別始乎此也以齒食多者長也食少者幼也 頤養也
動於下止於上下咀物以養人也牙搯牙也隨形
言之也 輔車其骨強所以輔持口也或曰牙車牙所

載也或曰頷頷舍也口含物之車也或曰頰車亦所以載物也或曰鼪車鼪鼠之食積於頰人食似之故取名也凡繫於車皆取在下載上物也耳形也耳有一體屬著兩邊而形然也脣緣也口之緣也吻免也入之則碎出則免也又取技也漱垂所出恒加技拭因以為名也舌卷也可以卷制食物使不落也鼻下曰立人取立於鼻下狹而長似人立也口上曰髭髭姿也為姿容之美也口下曰承漿漿水也頤下曰鬚

鬚秀也物成乃秀人成而鬚生也亦取須體幹長而後生也 在頰耳旁曰髯隨口動搖髯髯然也 其上連髮曰鬢鬢濱也濱崖也為面額之崖岸也 鬢曲頭曰距距拒也言其曲似拒也 項确也堅确受枕之處也 頸倮也倮挺而長也 咽咽物也 腰在頤纓理之中也青徐謂之脰物投其中受而下之也又謂之噍氣所流通阨要之處也 胡互也在咽下垂能斂互物也 胸猶空也空氣所衝也 臆猶抑也抑氣所塞也 膺

壅也氣所壅塞也

腹複也富也腸胃之屬以自裏盛

復於外複之其中多品似富者也

心纖也所識纖微

無物不貫心也

肝幹也五行屬木故其體狀有枝幹

也凡物以大為幹也

肺勃也言其氣勃鬱也

脾裨

也在胃下裨助胃氣主化穀也

腎引也腎屬水主引

水氣灌注諸脉也

胃圍也圍受食物也

腸暢也通

暢胃氣去滓穢也

臍濟也腸端之所限劑也

胞胞

也胞空虛之言也主以虛承水汭也或曰膀胱言其體

短而橫廣也 自臍以下曰水腹水洿所聚也又曰少
腹少小也比於臍以上為小也 陰蔭也言所在蔭翳
也 脇挾也在兩旁臂所挾也 肋勒也檢勒五臟也
膈塞也塞上下使氣與穀不相亂也 腋繹也言可
張翕尋繹也 肩堅也 甲闔也與胸脇皆相會闔也
臂裨也在旁曰裨也 肘注也可隱注也 腕宛也
言可宛屈也 掌言可以排掌也 手須也事業之所
須也 節有限節也 爪紹也筋極為爪紹續指端也

背倍也在後稱也 脊積也積續骨節終上下也

尾微也承脊之末稍微殺也 要約也在體之中約結

而小也 髀緩也其腋皮厚而緩也 臂殿也高厚有

殿選也 尻廖也尻所在寥牢深也樞機也要髀股動

搖如樞機也 髀卑也在下稱也 股固也為強固也

膝伸也可屈伸也 脚却也以其坐時却在後也

脛莖也直而長似物莖也 膝頭曰膊膊圍也因形圍

圍而名之也或曰蹠蹠扁也亦因形而名之也 足

續也言續脛也 趾止也言行一進一止也 蹄底也
足底也 踝确也居足兩旁确确然也亦因其形踝
踝然也 足後曰跟在下旁著地一體任之象木根也
踵鍾也鍾聚也上體之所鍾聚也

釋名卷二

欽定四庫全書

釋名卷三

漢 劉熙 撰

釋姿容

姿資也資取也形貌之稟取為資本也 容用也合事

宜之用也

妍研也研精於事宜則無蚩繆也蚩癡也

兩脚進曰行行抗也抗足而前也 徐行曰步步捕

也如有所伺捕務安詳也

疾行曰趨趨赴也赴所至

也 疾趨曰走走奏也促有所奏至也 奔變也有急

變奔赴之也 仆踣也頓踣而前也 超卓也舉脚有

所卓越也 跳條也如草木枝條務上行也 立林也

如林木森然各駐其所也 騎支也兩脚支別也 乘

陞也登亦如之也 載載也在其上也 儋任也任力

所勝也 負背也置項背也 駐株也如株木不動也

坐挫也骨節挫屈也 伏覆也 偃安也 僵正直

聳然也 側逼也 據居也 企啟開也目延竦之時

諸機樞皆開張也 疎從也體皮皆從引也 視是也

察是非也 聽靜也靜然後所聞審也 觀翰也望之

延頸翰翰也 望茫也遠視茫茫也 跪危也兩膝隱

地體危倪也 跼忌也見所敬忌不敢自安也 拜於

丈夫為跌跌然屈折下就地也於婦人為扶自抽扶而

上下也 攀翻也連翻上及言也 掣制也制頓之使

順已也 牽弦也使弦急也 引演也徒演廣也 掬

局也使相局近也 撮捽也暫捽取之也 櫛义也五

指俱往也

捉促也使相促及也

執攝也使畏攝已

也 拈黏也兩指翕之黏著不放也

扶鐵也其處皮

薰黑色如鐵也

蹋榻也榻著地也

批裨也兩相裨

助共擊之也

搏博也四指廣博亦似擊之也

挾夾

也在旁也

捧逢也兩手相逢以執之也

懷回也本

有去意回來就已也亦言歸也來歸已也

抱保也相

親保也

載載也載之於頭也

提地也臂垂所持近

地也

挈結也結束也束持之也

持跲也跲之於手

中也 操抄也手出其下之言也 攬斂也斂置手中

也 擁翁也翁撫之也 撫敷也敷手以拍之也 拍

搏也手搏其上也 摩沙猶未殺也手上下言之也

蹙遵也遵迫之也 踐殘也使殘壞也 踏藉也以足

藉也 履以足履之因以名之也 蹈道也以足踐之

如道路也 跣弭也足踐之使弭服也 躡躡也登其

上使懾服也 匍匐小兒時也匍猶捕也藉索可執取

之言也匍伏也伏地行也人雖長大及其求事盡力之

勤猶亦稱之詩曰凡民有喪匍匐救之是也 偃蹇也

偃息而卧不執事也 蹇跛蹇也病不能作事今託病

似此而不宜執事役也 望佯佯陽也言陽氣在上舉

頭高似若望之然也 沐禿也沐者髮下垂禿者無髮

皆無上貌之稱也 卦賣卦掛也自卦於市而自賣邊

自可無慙色言此似之也 倚筴倚伎也筴作清筴也

言人多技巧尚輕細如筴也 窶數猶局縮皆小意也

齧掣掣卷掣也齧噬齧也語說卷掣與人相持齧也

舛摘猶譎摘也如醫別人脈知疾之意見事者之稱也
貸駭者貸言以物貸予駭者言必棄之不復得也
不相量事者之稱也此皆見於形貌者也卧化也精
氣變化不與覺時同也寐謚也靜謚無聲也寢權
假卧之名也寢侵也侵損事功也眠泯也無知泯泯
也覺告也寤忤也能與物相接忤也欠欽也開
張其口聲屑欽欽也嚏蹠也聲作蹠而出也笑鈔
也頰皮上鈔者也

釋長幼

人始生曰嬰兒。育前曰嬰。抱之嬰。前乳養之也。或曰嬰。
婉娶是也。言是人也。婉其啼聲也。故因以名之也。男
任也。典任事也。女如也。婦人外成如人也。故三從之。
義少如父教嫁如夫命。老如子言。青徐州曰。媼媼忤也。
始生時人意不喜忤忤然也。兒始能行曰孺孺濡也。
言濡弱也。七年曰悼。悼逃也。知有廉恥隱逃其情也。
亦言是時而死可傷悼也。毀齒曰齠。齠洗也。毀洗故。

齒更新生也

長

丁丈反

莢也言體莢也

幼少也言生

日少也

十五曰童故禮有陽童牛羊之無角者曰童

山無草木曰童言未巾冠似之也女子之未笄者亦稱之也 二十曰弱言柔弱也 三十曰壯言丁壯也

四十曰強言堅強也

五十曰艾艾治也治事能斷割

艾刈無所疑也

六十曰耆耆指也不從力役指事使

人也

七十曰耄頭髮白耄耄然也

八十曰耄耄鐵

也皮膚變黑色如鐵也

九十曰鮐背背有鮐文也或

曰黃耆鬚髮變黃也耆垢也皮色驪悴恒如有垢者也
或曰胡耆咽皮如鷄胡也或曰凍梨皮有斑黑如凍梨
色也或曰醜醜大齒落盡更生細者如小兒齒也 百
年曰期頤頤養也老昏不復知服味善惡孝子期於盡
養道而已也 老朽也老而不死曰仙仙遷也遷入山
也故其制字人旁作山也

釋親屬

親視也言相隱視也 屬續也恩相連續也 父甫也

始生已也 母冒也舍生已也 祖祚也祚物先也又
謂之王父王旺也家中所歸旺也王母亦如之 曾祖
從下推上祖位轉增益也 高祖高臯也最在上臯韜
諸下也 兄荒也荒大也故青徐人謂兄為荒也 弟
第也相次第而上也 子萼也相生蕃萼也 孫遜也
遜遁在後生也 曾孫義如曾祖也 玄孫玄懸也上
懸於高祖最在下也 玄孫之子曰來孫此在無服之
外其意疎遠呼之乃來也 來孫之子曰昆孫昆貫也

恩情轉遠以禮貫連之耳 昆孫之子曰仍孫以禮仍有之耳 恩意實遠也 仍孫之子曰雲孫言去已遠如浮雲也皆為早娶晚死壽考者言也 父之兄曰世父言為嫡統繼世也又曰伯父伯把也把持家政也 父之弟曰仲父仲中也位在中也 仲父之弟曰叔父叔少也 叔之弟曰季父季癸也甲乙之次癸最在下季亦然也 父之世父母曰從祖父母言從已親祖別而下也亦言隨從已祖以為名也 父之姊妹曰姑姑故

也言於己為久故之人也 姊積也猶日始出積時多而明也 妹昧也猶日始入歷時少尚昧也 姑謂兄弟之女為姪姪迭也共行事夫更迭進御也 夫之父曰舅舅舅久也久老稱也 夫之母曰姑亦言故也 母之兄弟曰舅亦如之也 妻之父曰外舅母曰外姑言妻從外來謂至己家為婦故反以此義稱之夫妻匹嫡之義也 妻之昆弟曰外甥其姊妹女也來歸己內為妻故其男為外甥之甥甥者生也他姓子本生於外不

得如其女來在己內也 姊妹之子曰出出嫁於異姓而生之也 出之子曰離孫言遠離己也 姪之子曰歸孫婦人謂嫁曰歸姪子列故其所生為孫也 妻之姊妹曰娣娣弟也言與己妻相長弟也 母之姊妹曰姨亦如之禮謂之從母為娣而來則從母列也故雖不來猶以此名之也 姊妹互相謂夫曰私言於其夫兄弟之中此人與己姊妹有恩私也 舅謂姊妹之子曰甥甥亦生也出配他男而生故其制字男旁從生也

妾謂夫之嫡妻曰女君夫為男君故名其妻曰女君也
嫂嫂也嫂老者稱也嫂縮也人及物老皆縮小於舊
也 叔少也幼者稱也叔亦倣也見嫂倣然却退也

夫之兄曰公公君也君尊稱也 俗間曰兄章章灼也

章灼敬奉之也又曰兄忪是已所敬見之忪忪自肅齊
也俗或謂舅曰章又曰忪亦如之也 少婦謂長婦曰

似言其先來已所當法似也 長婦謂少婦曰娣娣弟

也以後來也或曰先後以來先後言之也青徐人謂

長婦曰植長禾苗先生者曰植取名於此也荊豫人謂長婦曰熟熟祝也祝始也 兩壻相謂曰亞言一人取

姊一人取妹相亞次也又並來至女氏門姊夫在前妹夫在後亦相亞而相倚共成其禮也又曰女壻言相親友也 婦之父曰婚言壻親迎用昏又恒以昏夜成禮

也 壻之父曰姻姻因也女往因媒也 天子之妃曰

后后後也言在後不敢以副言也 諸侯之妃曰夫人

夫扶也扶助其君也 卿之妃曰內子子女子也在閨

門之內治家也 大夫之妃曰命婦 婦服也 服家事也
夫受命於朝 妻受命於家也 士庶人曰妻 妻齊也 夫
賤不足以尊 稱故齊等言也 天子妾有嬪 嬪賓也 諸
妾之中見賓敬也 妾接也以賤見接幸也 姪娣曰媵
媵承事嫡也 配輩也 一人獨處一人往輩耦之也
匹辟也 往相辟耦也 耦遇也 二人相對遇也 嫡敵也
與匹相敵也 庶撫也 拾撫之也 謂拾撫微陋待遇之
也 無妻曰鰥 鰥昆也 昆明也 愁悵不寐 目恒鰥鰥然

也故其字從魚魚目恒不閉者也 無夫曰寡寡蹀也
蹀蹀單獨之言也 無父曰孤孤顧也顧望無所瞻見
也 老而無子曰獨獨隻獨也言無所依也

釋名卷三

欽定四庫全書

釋名卷四

漢 劉熙 撰

釋言語

道導也所以通導萬物也 德得也得事宜也 文者

會集衆綵以成錦繡會集衆字以成辭義如文繡然也

武舞也征伐動行如物鼓舞也故樂記曰發揚蹈厲

太公之志也 仁忍也好生惡殺善含忍也 義宜也

裁制事物使合宜也

禮體也得事體也

智知也無

所不知也

信申也言以相申束使不相逢也

孝好

也愛好父母如所悅好也孝經說曰孝畜也畜養也

慈字也

字愛物也

友有也相保有也

恭拱也自

拱持也亦言供給事人也

悌弟也

敬警也恒自肅

警也

漫漫也漫漫心無所限忌也

通洞也無所不

貫洞也

達澈也

敏閔也進敎無否滯之言也故汝

頤言敏曰閔也

篤築也築堅實稱也

厚後也有終

後也故青徐人言厚曰後也 薄迫也單薄相逼迫也

懿儼也言奧儼也 良量也量力而動不敢越限

也 言宣也宣彼此之意也 語敘也叙已所欲說也

說述也序述之也 序杼也棧杼其實也 柘泄也

發泄出之也 發撥也撥使開也 撥播也播使移散

也 導陶也陶演己意也 演延也言蔓延而廣也

頌容也序說其成功之形容也 讚錄也省錄之也

銘名也記名其功也 勒刻也刻識之也 紀記也紀

識之也 識幟也有章幟可按視也 視是也察具是

非也 是嗜也人嗜樂之也 非排也人所惡排去也

基據也在下物所依據也 業捷也事捷乃有功業

也 事偉也偉立也凡所立之功也故青徐言立曰偉

也 功攻也攻治之乃成也 取趣也 名明也名實

事使分明也 號呼也以其善惡呼名之也 善演也

演盡物理也 惡扼也扼困物也 好巧也如巧者之

造物無不皆善人好之也 醜臭也如臭穢也 遲頽

也不進之言也 疾截也有所越截也 緩浼也斷也

持之不急則動搖浼斷自放縱也 急及也操切之使

相逮及也 巧考也考合異類共成一體也 拙屈也

使物否屈不為用也 燥焦也 濕浥也 强薑也

弱衄也 言委也 能該也無物不兼該也 否鄙也

鄙劣不能有所堪成也 躁燥也物燥乃動而飛揚也

靜整也 逆還也言不從其理則生殿還不順也

順循也循其理也 青青也去濁遠穢色如青也 濁

漬也汁滓演漬也

貴歸也物所歸仰也汝穎言貴聲

如歸往之歸也

賤踐也卑下見踐履也

榮猶榮也

熒熒照明貌也

辱衄也言折衄也

禍毀也言毀滅

也福富也其中多品如富者也

進引也引而前也

退墜也

羸累也恒累於人也

健建也能有所建

為也哀愛也愛乃思念之也

樂樂也使人好樂之

也委委也萎蕤就之也

曲局也相近局也

蹤從

也人形從之也

跡積也積累而前也

扶傳也傳近

之也將救護之也 縛薄也使相薄著也 束促也相

促近也 覆孚也如孚甲之在外物也 蓋加也加物

上也 威畏也可畏懼也 嚴儼也儼然人憚之也

政正也下所取正也 教倣也下所法倣也 侍時也

尊者不言常於時供所當進者也 御語也尊者將有

所欲先語之也亦言職卑尊者所勒御如御牛馬然也

雅雒也為之難人將為之雒雒然憚之也 俗欲也

俗人所欲也 艱根也如物根也 難憚也人所忌憚

也 吉實也有善實也 凶空也就空亡也 停定也

定於所在也 起啟也啟一舉體也 翺教也言教遊

也 翔佯也言仿佯也 出推也推而前也 入納也

納使還也 候護也司護諸事也 望惘也視遠惘惘

也 狡交也與物交錯也 夬決有所破壞決裂之於

終始也 始息也言滋息也 消削也言減削也 息

塞也塞滿也 姦奸也言奸正法也 完侏也侏易常

正也 誰相也有相擇言不能一也 往睢也歸睢於

彼也故其言之於印頭以指遠也 來哀也使來入已

哀之故其言之低頭以招之也 麤錯也相遠之言也

納弭也弭弭兩致之言也 疏索也獲索相遠也 密

蜜也如蜜所塗無不滿也 甘含也人所含也 苦吐

也人所吐也 安晏也晏晏然和喜無動懼也 危阮

也阮阮不固之言也 成盛也 敗潰也 亂渾也

治值也物皆值其所也 煩繁也物繁則相雜撓也

省嗇也曜嗇約少之言也 間簡也事功簡省也 劇

巨也事功巨也

貞定也精定不動惑也

淫浸也浸

淫旁人之言也

沈澹也澹然安著之言也

浮孚也

孚甲在上稱也

貪探也探入他分也

廉斂也自檢

斂也

潔確也確然不羣貌也

污滂也如滂泥也

公廣也可廣施也

私恤也所恤念也

勇踴也遇敵

踴躍欲擊之也

怯脇也見敵恐脇也

斷段也分為

異段也

絕截也如割截也

罵迫也以惡言迫彼人

也 詈歷也以惡言相彌歷也亦言離也以此卦離之

也 祝屬也以善惡之詞相屬著也 詛阻也使人行
事阻限於言也 盟明也告其事於神明也 誓制也
以拘制之也 佐左也在左右也 助乍也乍往相阻
非長久也 飾拭也物穢者拭其上使明由他物而後
明猶加文於質上也 蕩盪也排盪去穢垢也 啜啜
也心有所念惛然發此聲也 嗟佐也言之不足以盡
意故發此聲以自佐也 噫憶也憶念之故發此聲憶之
也 鳴舒也氣憤滿故發此聲以舒寫之也 念黏也

意相親愛心黏著不能忘也 憶意也恒在意中也

思司也凡有所司捕必靜思忖亦然也 克刻也刻物

有定處人所克念有常心也 慮旅也旅衆也易曰一

致百慮慮及衆物以一定之也

釋飲食

飲奄也以口奄而引咽之也 食殖也所以自生殖也

啜絕也乍啜而絕於口也 餐乾也乾入口也 吮

循也不絕口稍引滋洵循咽而下也 嗽促也用口急

促也 含合也合口停之也銜亦然也 咀藉也以藉

齒牙也 嚼削也稍削也 鳥曰啄如啄物上復下也

獸曰齧齧齧也所臨則禿齧也 餅并也溲麵使合

并也胡餅作之大漫沍也亦言以胡麻著上也蒸餅

湯餅蝎餅髓餅金餅索餅之屬皆隨形而名之也 糝

糲也相黏糲也 餌而也相黏而也充豫曰溲浹就

形名之也 糝漬也蒸燥屑使相潤漬餅之也 饋分

也衆粒各自分也 殮散也投水於中解散也 嘆汪

也汁汪郎也

膈蒿也香氣蒿蒿也

糜煮米使糜爛

也粥濯於糜粥粥然也

漿將也飲之寒溫多少與

體相將順也

湯熱湯湯也

酪澤也乳作汁所使人

肥澤也

藿濟也與諸味相濟成也

藟阻也生釀之

遂使阻於寒溫之間不得爛也

醕投也味相投成也

醢海也冥也封塗使密冥乃成也醢多汁者曰醢醢

瀡也宋魯人皆謂汁為瀡醢有骨者曰醢

如吮反

醢肥也

骨肉相搏脫無汁也

豉嗜也五味調和須之而成乃

可甘嗜也故齊人謂豉聲如嗜也 麴朽也鬱之使生

衣朽敗也 蘖缺也漬麥覆之使生牙開缺也 鮓菹

也以鹽米釀之如菹熟而食之也 腊乾昔也 脯搏

也乾燥相搏著也又曰修脩縮也乾燥而縮也 膊迫

也薄脍肉迫著物使燥也 膾會也細切肉令散分其

赤白異切之已乃會合和之也 炙炙也炙如火上也

脯炙以錫蜜豉汁淹之脯脯然也 釜炙於釜汁中

和熟之也 脰銜也銜炙細密肉和以薑椒鹽豉已乃

以肉銜裏其表而炙之也

貊炙全體炙之各自以刀

割出於胡貊之為也

膾細切猪羊馬肉使如膾也

生脰以一分膾二分細切合和挺攪之也

血腦以血

作之增其酢豉之味使苦苦以消酒也

消膏而加菹

其中亦以消酒也

生瀹蔥薤曰允言其柔滑兌兌然

也 韓羊韓兔韓鷄本法出韓國所為也猶酒言宜成

醪蒼梧清之屬也

臠奧也藏肉於奧內稍出用之也

腍赴也夏月赴疾作之久則臭也

分乾切猪肉以

梧分乾其中而和之也 肺騃騃饋也以米糝之如膏

饋也 雞纖細擗其腊令纖然後漬以酢也兔纖亦如

之 錫洋也煮米消爛洋洋然也 飴小弱於錫形怡

怡也 哺舖也如錫而濁可舖也 酒酉也釀之米麴

酉澤久而味美也亦言馱也能否皆強相馱待飲之也

又入口咽之皆馱其面也 緹齊色赤如緹也 盎齊

盎滂滂然濁色也 汎齊浮蟻在上汎汎然也 沉齊

濁滓沉下汁清在上也 醴齊醴禮也釀之一宿而成

禮有酒味而已也 醪酒久釀而澤也 事酒有事而

釀之酒也 苦酒淳毒甚者酢苦也 寒粥末稻米投

寒水中育育然也 干飯飯而暴乾之也 糗齏也飯

而磨之使齏碎也 餽候也候人饑者以食之也 煮

麥曰麴麴亦齏也煮熟亦齏壞也 柰油搗柰實和以

塗繒上燥而發之形似油也 柰油亦如之 桃濫水漬

而藏之其味濫濫然酢也 柰脯切柰暴乾之如脯也

鮑魚鮑腐也埋藏奄使腐臭也 蟹胥取蟹藏之使

骨肉解之胥胥然也 蟹螯去其匡螯熟搗之令如螯也 桃諸藏桃也諸儲也藏以為儲待給冬月用之也 瓠蓄皮瓠以為脯蓄積以待冬月時用之也

釋綵帛

青生也象物生時色也 赤赫也太陽之色也 黃晃也猶晃晃象日光色也 白啟也如水啟時色也 黑晦也如晦冥時色也 絳工也染之難得色以得色為工也 紫疵也非正色五色之疵瑕以惑人者也 紅

絳也白色之似絳者也 緇桑也如桑葉初生之色也

綠劉也荆泉之水於上視之劉然綠色此似之也

縹猶漂漂淺青色也有碧縹有天縹有骨縹各以其色
所象言之也 緇滓也泥之黑者曰滓此色然也 皂

早也日未出時早起視物皆黑此色如之也 布布也

布列衆縷為經以緯橫成之也又太古衣皮女工之始
始於是施布其法使民盡用之也 踈者言其經緯踈

也 絹鉅也其絲鉅厚而踈也 縑兼也其絲細緻數

兼於布絹也細緻染縑為五色細且緻不漏水也練
爛也煮使委爛也素朴素也已織則供用不復加巧
飾也又物不加飾皆自謂之素此色然也綈似蛄蟲
之色綠而澤也錦金也作之用功重於其價如金故
其制字帛與金也綺𦏧也其文𦏧邪不順經緯之縱
橫也有杯文形似杯也有長命其綠色相間皆橫終幅
此之謂也言長命者服之使人命長本造意之意也有
棋文者方文如棋也綾凌也其文望之如水凌之理

也 繡修也文修修然也 羅文疎羅也 纚徒也麤

可以篋物也令辟經絲貫杼中一間并一間疏疏者苓

苓然并者歷辟而密也 紡麤絲織之曰疏疏寥也寥

寥然也 穀粟也其形足足而踰視之如粟也又謂沙

穀亦取踰踰如沙也 總齊人謂涼為惠言服之輕細

涼惠也 紉渙也細澤有光煥煥然也 蒸栗染紺使

黃色如蒸栗然也 紺含也青而含赤色也 縣猶洒

洒柔而無文也 綸倫也作之有倫理也 絮胥也胥

久故解落也 紬抽也抽引絲端出細緒也又謂之絰
絰挂也挂於帳端振舉之也 繭曰幕也貧者著衣可
以幕絡絮也或謂之牽離者熟爛牽引使離散如綿然
也

釋首飾

冠貫也所以貫韜髮也 纓頸也自上而繫於頸也
并係也所以繫冠使不墜也 祭服曰冕冕猶俛也俛
平直貌也亦言文也玄上纁下前後垂珠有文飾也

有衮冕衮卷也畫卷龍於衣也 有鷩冕鷩雉之態惡

者山雞是也鷩鷩也性急鷩不可生服必自殺故畫其

形如衣以象人執耿介之節也 毳冕毳芮也畫藻文

於衣象水草之毳芮溫暖而潔也 黼冕黼紕也畫黼

紕文紕於衣也此皆隨衣而名之也所垂前後珠轉減

耳 章甫殷冠名也甫丈夫也服之所以表章丈夫也

牟追牟冒也言其形冒髮追追然也 收夏后氏冠

名也言收斂髮也 委貌冠形又委貌之貌上小下大

也 弁如兩手相合拊時也以爵韋為之謂之爵弁以鹿皮為之謂之皮弁以韎韐為之謂之韐弁也 纓以韠髮者也以纓為之因以為名 總束髮也總而束之也 幘蹟也下齊員蹟然也充上下小大兒然也或曰耿耿折其後也或曰幘形似幘也賤者所著曰兒髮作之裁裏髮也或曰牛心形似之也 帽冒也巾謹也二十成人士冠庶人巾當自謹修於四教也 簪髻也以髻連冠於髮也又枝也因形名之也 拂摘也所以

摘髮也

導所以導櫟鬢髮使人巾幘之裏也或曰櫟

鬢以事名之也

鏡景也言有光景也

梳言其齒疏

也數言比比於疎其齒差數也比言細相比也

刷帥

也帥髮長短皆令上從也言亦瑟也刷髮令上瑟然也

鑷攝也攝取髮也

綃頭綃釵也釵髮使上從也或

曰陌頭言其從後橫陌而前也齊人謂之幘言幘斂髮

使上從也

王后首飾曰副副覆也以覆首亦言副貳

也兼用衆物成其飾也

編編髮為之次第髮也髻

髮被也髮少者得以被助其髮也 髻剔也剔形人之

髮為之也步搖上有垂珠步則搖也 箇恢也恢廊覆

髮上也魯人曰頰頰傾也著之傾近前也齊人曰幌飾

形貌也華象草木華也 勝言人形容正等一人著之

則勝也 蔽髮前為飾也 爵釵釵頭及上施爵也

瑱鎮也懸當耳旁不欲使人妄聽自鎮重也或曰充耳

充塞也塞耳亦所以止聽也故里語曰不瘖不聾不成

姑公 穿耳施珠曰瑤此本出於蠻夷所為也蠻夷婦

女輕淫好走故以此琅璫鍾之也今中國人倣之耳

脂砥也著面柔滑如砥石也 粉分也研米使分散也

胡粉胡餬也脂和以塗面也 黛代也滅眉毛去之

以此畫代其處也 屑脂以丹作之象屑赤也 香澤

者人髮恒枯悴以此濡澤之也 強其性凝強以制服

亂髮也 以丹注面曰勻勻灼也此本天子諸侯羣妾

當以次進御其有月事者止而不御重以口說故注此

於面灼然為識女史見之則不書其名於第錄也 輕

粉粧赤也染粉使赤以著頰上也

釋名卷四

欽定四庫全書

釋名卷五

漢 劉熙 撰

釋衣服

凡服上曰衣衣依也人所依以庇寒暑也 下曰裳裳

障也所以自障蔽也 領頸也以壅頸也亦言總領衣

體為端首也 襟禁也交於前所以禁禦風寒也 袂

掣也掣開也開張之以受臂屈伸也 祛虛也 袖由

也手所由出入也亦言受也以受手也 衿亦禁也禁

使不得解散也 帶蒂也著於衣如物之繫蒂也 系

繫也相連繫也 衽襜也在旁襜襜然也 裾倨也倨

倨然直亦言在後常見踞也 玄端其袖下正直端方

與要接也 素積素裳也辟積其要中使跂因以名之

也 王后之上服曰褱衣畫翬雉之文於衣也伊洛而

南雉青質五色備曰翬翬畫鷩雉之文於衣也江淮

而南雉素質五采皆備成章曰鷩 闕翟剪闕繒為翟

雉形以緞衣也 鞠衣黃如菊花色也 禮衣禮坦也

坦然正白無文采也 祿衣祿然黑色也 韠蔽也所

以蔽膝前也婦人蔽膝亦如之齊人謂之巨巾田家婦

女出自田野以覆其頭故因以為名也又曰跪襜跪時

襜襜然張也 佩倍也言其非一物有倍貳也有珠有

玉有容刀有帨巾有觿之屬也 襦更也言溫更也

袴跨也兩股各跨別也 褶襲也覆上之言也 禪衣

言無裏也 襦屬也衣裳上下相連屬也荊州謂禪衣

曰布襦亦是襜褕言其襜褕弘裕也 襦褌衣之無胡

者也言袖夾直形如溝也 中衣言在小衣之外大衣

之中也 裋褕其一當胷其一當背也 怕腹橫帕其

腹也 抱腹上下有帶抱裏其腹上無襠者也 心衣

抱腹而施鉤肩鉤肩之間施一襠以奄心也 衫芟也

衫未無袖端也 有裏曰複 無裏曰單 反閉襦之

小者也却向著之領反於背後閉其襟也 婦人上服

曰袿其下垂者上廣下狹如刀圭也 襖撰也青絳為

之緣也 裙下羣也連接裾幅也 緝下橫縫緝其下

也 緣裙裾施緣也 緣襦襦施緣也 帔披也披之

肩背不及下也 直領邪直而交下亦如丈夫服袍方

也 交領就形名之也 曲領在內以中襟領上橫壅

頸其狀曲也 單襦如襦而無絮也 要襦形如襦其

要上趺下要齊也 半袖其袂半襦而施袖也 留幕

冀州所名大褶下至膝者也留牢也幕絡也言牢絡在

衣表也 袍丈夫著下至跗者也袍苞也苞內衣也婦

人以絳作衣裳上下連四起施緣亦曰袍義亦然也齊人謂如衫而小袖曰侯頭侯頭猶言解漬臂直通之言也 被被也被覆人也 衾广也其下廣大如广受人也 汗衣近身受汗垢之衣也詩謂之澤受汗澤也或曰鄙袒或曰羞袒作之用六尺裁足覆胷背言羞鄙於袒而衣此耳 禪貫也貫兩脚上繫要中也 偁所以自逼束今謂之行滕言以裹脚可以跳騰輕便也 襪末也在脚末也 履禮也飾足所以為禮也 複其下

曰爲烏腊也行禮久立地或泥濕故複其末下使乾腊也屨拘也所以拘足也齊人謂韋屨曰扉扉皮也以皮作之不借言賤易有宜各自蓄之不假借人也齊人云搏腊搏腊猶把鮓羸貌也荊州人曰羸麻常車皆同名也羸措也言所以安措足也僑蹻也出行著之蹻蹻輕便因以爲名也屨措也爲兩足措以踐泥也鞞跨也兩足各以一跨騎也鞞鞞鞞之缺前壅者胡中所名也鞞鞞猶速獨足直前之言也鞋解

也著時縮其上如履然解其上則舒解也 帛履以帛
作之如屨者不曰帛屨者屨不可踐泥也 屨踐泥者
也此亦可以步泥而浣之故謂之屨也 晚下如舄其
下晚晚而危婦人短者著之可以拜也 鞞韋履深頭
者之名也鞞襲也以其深襲覆足也 仰角屨上施
履之名也行不得蹶當仰履角舉足乃行也

釋宮室

宮穹也屋見於垣上穹隆然也 室實也人物實滿其

中也 室中西南隅曰奧不見戶明所在祕奧也 西北隅曰屋漏禮每有親死者輒撤屋之西北隅薪以爨竈煮沐供諸喪用時若值雨則漏遂以名之也必取是隅者禮既祭改設饌於西北隅令撤毀之示不復用也 東南隅曰窔窔幽也亦取幽冥也 東北隅曰宦宦養也東北陽氣始出布養物也 中央曰中雷古者寢穴後室之雷當今之棟下直室之中古者雷下之處也 宅擇也擇吉處而營之也 舍於中舍息也 宇羽

也如鳥羽翼自覆蔽也 屋亦奧也其中溫奧也 廟
貌也先祖形貌所在也 寢寢也所寢息也 城盛也
盛受國都也 郭廓也廓落在城外也 城上垣曰睥
睨言於其孔中睥睨非常也亦曰陴陴裨也言裨助城
之高也亦曰女牆言其卑小比之於城若女子之於丈
夫也 寺嗣也治事者嗣續於其內也 廷停也人所
集之處也 獄确也實确人之情偽也又謂之牢言所
在堅牢也又謂之圜土築其表牆其形圜也又謂之圜

園囿領也園御也領錄因徒禁御之也 亭停也亦人

所停集也 傳傳也人所止息而去後人復來轉相傳

無常主也 瓦踝也踝确堅貌也亦言踝也在外踝見

也 梁強梁也 柱住也 櫨隱也所以隱桷也或謂

之望言高可望也或謂之棟棟中也居屋之中也 桷

确也其形細而疎确也或謂之椽椽傳也相傳次而布

列也或謂之椽在櫨旁下列衰衰然垂也 栢旅也連

旅旅也或謂之椽椽縣也縣連椽椽頭使齊平也上入

曰爵頭形似爵頭也 楣眉也近前若面之有眉也

榑儒也梁上短柱也榑儒猶侏儒短故以名之也 梧

在梁上兩頭相觸梧也 欂櫨也其體上曲欂拳然也

盧在柱端都盧負屋之重也 斗在欂兩頭如斗也

斗負上負榑也 桷迤也編竹相連迤迤也 屋脊曰

薨薨蒙也在上覆蒙屋也 壁辟也辟禦風寒也 墻

障也所以自障蔽也 垣援也人所依阻以為援衛也

墉容也所以蔽隱形容也 籬籬也以柴竹作之疏

離離也青徐曰椐椐居也居於中也 柵蹟也以木作
之上平蹟然也又謂之撤撤緊也訕訕然緊也 殿有
殿鄂也陞卑也有高卑也天子殿謂之納陞言所以納
人言之階陞也 階梯也如梯之有等差也 陳堂塗
也言賓主相迎陳列之處也 屏自障屏也 蕭牆在
門內蕭蕭也將入於此自肅敬之處也 宁佇也將見
君所佇立定氣之處也 序次序也 夾室在堂兩頭
故曰夾也 堂猶堂堂高顯貌也 房旁也在堂兩旁

也 楹亭也亭亭然孤立旁無所依也齊魯讀曰輕輕
勝也孤立獨處能勝任上重也 簷檐也接檐屋前後
也 霤流也水從屋上流下也 闕在門兩旁中央闕
然為道也 杲愚在門外杲復也愚思也臣將入請事
於此復重思之也 觀觀也於上觀望也 樓謂牖戶
之間有射孔樓樓然也 臺持也築土堅高能自勝持
也 櫓露也露上無屋覆也 門捫也在外為人所捫
摸也 障衛也 戶護也所以謹護閉塞也 窓聰也

於內窺外為聰明也 屋以草蓋曰茨茨次也次此草
為之也 寄上曰廬廬慮也取自覆慮也 草圓屋曰
蒲蒲敷也總其上而敷下也又謂之庵庵奄也所以自
覆奄也 大屋曰廡廡輜也輜覆也并冀人謂之庑庑
正也屋之正大者也 井清也泉之清潔者也井一有
水一無水曰罽罽竭也均有水聲洵洵也 竈造也
造創食物也饔銓也銓度甘辛調和之處也 倉藏也
藏穀物也 庫舍也物所在之舍也故齊魯謂庫曰舍

也 廩爲也 勾聚也 牛馬之所聚也 廩矜也 寶物可

矜惜者投之其中也 困繆也 藏物繆繆束縛之也

庚裕也 言盈裕也 露積之言也 盈裕不可稱受所以露

積之也 困屯也 屯聚之也 圉以草作之團團然也

廁言人雜在上非一也 或曰溷言溷濁也 或曰圉至

穢之處宜常修治使潔清也 或曰軒前有伏似殿軒也

泥邇也 邇近也以水沃土使相黏近也 堊杜也 相

塞孔穴也 堊亞也 次也 先泥之次以白灰飾之也

堅猶煇煇細澤貌也

釋名卷五

欽定四庫全書

釋名卷六

漢 劉熙 撰

釋牀帳

人所坐卧曰牀牀衽也所以自衽載也長狹而卑曰榻
言其榻然近地也 小者曰獨坐主人無二獨所坐也
枰平也以板作其體平正也 几廢也所以廢物也
筵衍也舒而平之衍衍然也 席釋也可卷可釋也

簟簟也布之簟簟然平正也薦所以自薦藉也

蒲草也以蒲作之其體平也氊旃也毛相著旃旃然

也褥辱也人所坐褻辱也裘洩猶屢數毛相離之

言也榻登施大牀之前小榻之上所以登牀也貂

席連貂皮以為席也枕檢也所以檢項也帷圍也

所以自障圍也幕幕絡也在表之稱也小幕曰帝

張在人上帝帝然也幔漫也漫漫相連綴之言也

帳張也張施於牀上也小帳曰斗形如覆斗也幰廉

也自障蔽為庶恥也 幢容也施之車蓋童童然以隱蔽形容也 戶幰施於戶外也 牀前帷曰帖言帖帖而垂也 握屋也以帛衣板施之形如屋也 承塵施於上承塵土也 搏壁以席搏著壁也 扆倚也在後所依倚也 屏風言可以屏障風也

釋書契第十九

筆述也述事而書之也 硯研也研墨使和濡也 墨痔也似物痔墨也 紙砥也謂平滑如砥石也 板般

也般般平廣也 奏鄒也鄒狹小之言也 札櫛也編
之如櫛齒相比也 簡間也編之篇篇有間也 簿言
可以簿疏密也 笏忽也君有教命及所啟白則書其
上備忽忘也 槩板之長三尺者也槩漸也言其漸漸
然長也 牘睦也手執之以進見所以為恭睦也 籍
籍也所以籍疏人名戶口也 檄激也下官所以激迎
其上之書文也 檢禁也禁閑諸物使不得開露也
璽徙也封物使可轉徙而不可發也 印信也所以封

物為信驗也亦言因也封物相因付也 謁詣也詣告也書其姓名於上以告所至詣者也 符付也書所敕命於上付使轉行之也 節赴也執以赴君命也 傳轉也轉移所在執以為信也 券繼也相約束繼繼以為限也 翦別也大書中央中破別之也 契刻也刻識其數也 策書教令於上所以驅策諸下也 漢制約敕封侯曰冊冊願也敕使整願不犯之也 示示也過所至關津以示之也 詣啓也以君語官司所至詣

也 書庶也紀庶物也亦言著之簡紙永不滅也 畫
挂也以五色挂物上也 書稱刺書以筆刺紙簡之上
也又曰寫倒寫此文也書姓字於奏上曰書刺作再拜
起居字皆達其體使書盡邊徐引筆書之如畫者也下
官刺曰長刺長書中央一行而下之也又曰爵里刺書
其官爵及郡縣鄉里也 書稱題題諦也審諦其名號
也亦言第因其第次也 書文書檢曰署署予也題所
予者官號也 上敕下曰告告覺也使覺悟知己意也

下言上曰表思之於內表施於外也又曰上示之於上也又曰言言其意也約約束之也敕飾也使自警飾不敢廢慢也謂猶謂也猶得敕不自安謂謂然也

釋典藝

三墳墳分也論三才之分天地人之治其體有三也五典典鎮也制法所以鎮定上下其等有五也八索索素也著素王之法若孔子者聖而不王制此法者有

八也 九丘丘區也區別九州土氣教化所宜施者也
此皆三王以前上古義皇時書也今皆亡惟堯典存也
經徑也如徑路無所不通可常用也 緯圍也反覆
圍繞以成經也 圖度也盡其品度也 織織也其義
纖微也 易易也言變易也 禮體也得其事體也
儀宜也得事宜也 傳傳也以傳示後人也 記紀也
紀識之也 詩之也志之所之也興物而作謂之興敷
布其義謂之賦事類相似謂之比言王政事謂之雅稱

頌成功謂之頌隨作者之志而別名之也 尚書尚上

也以堯為上始而書其時事也 春秋春秋冬夏終而

成歲春秋書人事卒歲而究備春秋溫涼中象政和也

故舉以為名也 國語記諸國君臣相與言語謀議之

得失也又曰外傳春秋以魯為內以諸國為外外國所

傳之事也 爾雅爾昵也昵近也雅義也義正也五方

之言不同皆以近正為主也 論語紀孔子與諸弟子

所語之言也 法逼也莫不欲從其志逼正使有所限

也 律累也累人心使不得放肆也 令領也理領也
使不相犯也 科課也課其不如法者罪責之也 詔
書詔昭也人暗不見事宜則有所犯以此示之使昭然
知所由也 論倫也有倫理也 稱人之美曰讚讚纂
也纂集其美而叙之也 叙杼也杼洩其實宣見之也
銘名也述其功美使可稱名也 誅累也累列其事
而稱之也 謚也物在後為曳言名之於人亦然也
譜布也布列見其事也 統緒也主緒人世類相繼

如統緒也 碑被也此本王莽時所設也施其轆轤以繩被其上以引棺也臣子追述君父之功美以書其上後人因焉故無建於道陌之頭顯見之處名其文就謂之碑也 詞嗣也令撰善言相續嗣也

釋名卷六

欽定四庫全書

釋名卷七

漢 劉熙 撰

釋用器

斧甫也甫始也凡將制器始用斧伐木已乃制之也

鎌廡也體廡薄也其所刈稍稍取之又似廉者也 斨

戕也所伐皆戕毀也 仇矛讎也所伐則平如討仇讎

也 錐利也 椎推也耒亦椎也 鑿有所穿鑿也

鎬鎬也有所鎬入也 耜似也似齒之斷物也 犁利

也利則發土絕草根也 檀坦也摩之使坦然平也

鋤助也去穢助苗長也齊人謂其柄曰檀檀然正直也

頭曰鶴似鶴頭也 枷加也加杖於柄頭以耨穗而出

其穀也或曰羅枷三杖而用之也或曰丫丫杖轉於頭

故以名之也 鍤插也插地起土也或曰銷銷削也能

有所穿削也或曰鐮鐮剗也剗地為坎也其板曰葉象

木葉也 把播也所以播除物也 拂撥也撥使聚也

耨以鋤嫗耨禾也 鑄亦鋤類也鑄迫也 鑄溝也

既割去壟上草又辟其土以壅苗根使壟下為溝受水

潦也 鉏殺也言殺草也 鉏穫黍鐵也鉏鉏斷黍穗

聲也 鉏謹也板廣不可得制削又有節用則此鉏之

所以詳謹令平滅斧跡也 鋤鋤彌也鉏有高下之跡

以此鋤彌其上而平之也 鋸居也其體直所截應倨

句之平也 鋤誅也主以誅除物根株也

釋樂器

鍾空也內空受氣多故聲大也 磬聲也其聲聲聲然

堅緻也 鼓郭也張皮以冒之其中空也 鞀導也所

以導樂作也 鞀裨也裨助鼓節也 聲在前曰朔朔

始也在後曰應應大鼓也 所以懸鼓者橫曰簨簨峻

也在上高峻也從曰虞虞舉也在旁舉簨也簨上之板

曰業刻為牙捷業如鋸齒也 瑟施弦張之瑟瑟然也

箏施弦高急箏箏然也 筑以竹鼓之筑秘之也

塋候此師延所作靡靡之樂也後出於桑間濮上之地

蓋空國之侯所存也師涓為晉平公鼓焉鄭衛分其地而有之遂號鄭衛之音謂之淫樂也 枇杷本出於胡中馬上所鼓也推手前曰枇引手却曰杷象其鼓時因以為名也 塤喧也聲獨喧喧然也 虡啼也聲從孔出如嬰兒啼聲也 簫肅也其聲肅肅而清也 笙生也象物貫地而生也 竹之貫匏以匏為之故曰匏也芋亦是也其中汙空以受簧也 簧橫也於管頭橫施於中也以竹鐵作於口橫鼓之亦是也 搏拊也以韋盛

糠形如鼓以手附拍之也

祝狀如伏虎如見祝祝然

也故訓為始以作樂也

敵衙也衙止也所以止樂也

舂撞也牘筑也以舂築地為節也

籥躍也氣躍出

也 遂滌也其聲滌滌然也

鐃聲鐃鐃也

人聲曰

歌歌柯也歌之言是其質也以聲吟詠有上下如草木

之有柯葉也故兗冀言歌聲如柯也

竹曰吹吹推也

以氣推發其聲也

吟嚴也其聲本出於憂愁故其聲

嚴肅使人聽之悽歎也

釋兵

弓穹也張之穹隆然也其末曰簫言簫梢也又謂之弭以骨為之滑弭弭也中央曰弣弣撫也人所持撫也簫弣之間曰淵淵宛也言曲宛也 弩怒也有勢怒也其

柄曰臂似人臂也鈎弦者曰牙似齒牙也牙外曰郭為牙之規郭也下曰懸刀其形然也合名之曰機言如機之巧也亦言如門戶之樞機開闔有節也 矢指也言

其有所指向迅疾也又謂之箭前進也其本曰足矢形

似木木以下為本本以根謂足也又謂之鎬鎬敵也可
以禦敵也齊人謂之鏃鏃族也言其所中皆族滅也關
西曰釭釭鉸也言有交叉也其體曰幹言挺幹也其旁
曰羽如鳥羽也鳥須羽而飛矢須羽而前也齊人曰衛
所以導衛矢也其末曰牯牯會也與弦會也牯旁曰义
形似义也其受之器以皮曰箛謂柔服用之也織竹曰
箏相迫箏之名也步义人所帶以箭义其中也馬上曰
鞬鞬建也弓矢並建立其中也 刀到也以斬伐到其

所刀擊之也其末曰鋒言若鋒刺之毒利也其本曰環形似環也其室曰削削峭也其形峭殺裏刀體也室口之飾曰琫琫捧也捧束口也下末之飾曰琕琕卑也在下之言也短刀曰拍髀帶時拍髀旁也又曰露拍言露見也佩刀在佩旁之刀也或曰容刀有刀形而無刃備儀容而已剪刀剪進也所剪稍進前也書刀給書簡札有所刊削之刀也封刀鉸刀削刀皆隨時名之也戟格也旁有枝格也戈句矛戟也戈過也所

刺搏則決過所鉤引則制之弗得過也 車戟曰常長

丈六尺車上所持也八尺曰尋倍尋曰常故稱常也

手戟手所持摘之戟也 矛冒也刃下冒矜也下頭曰

鏑鏑入地也松櫝長三尺其矜宜輕以松作之也櫝速

積也前刺之言也 矛長丈八尺曰稍馬上所持言其

稍稍便殺也又曰激矛激截也可以激截敵陣之矛也

仇矛頭有三叉言可以討仇敵之矛也 夷矛夷常

也其矜長丈六尺不言常而曰夷者言其可夷滅敵亦

車上所持也

矜

徐本作移

矛長九尺者也矜霍也所中霍

然即破裂也

矜矛矜殊也長大二尺而無刃有所撞

挫於車上使殊離也

盾遯也踧其後避以隱遯也大

而平者曰吳魁本作於吳為魁帥者所持也隆者曰須

盾本出於蜀須所持也或曰羌盾言出於羌也約脇而

鄒者曰陷虜言可以陷破虜敵也今謂之曰露見是也

狹而長者曰步盾步兵所持與刀相配者也狹而短者

曰矛盾車上所持者也矛小稱也以縫編板謂之本絡

以犀皮作之曰犀盾以木作之曰木盾皆因所用為名也 彭排彭旁也在旁排敵禦攻也 鎧猶塏也塏堅重之言也或謂之甲似物孚甲以自禦也 劍檢也所以防檢非常也又其在身拱時斂在臂內也其旁鼻曰鐔鐔尋也帶所貫尋也其末曰鋒鋒末之言也 鉞延也達也去此至彼之言也 鈎鑲兩頭曰鈎中央曰鑲或推鑲或鈎引用之之宜也 九旗之名日月為常畫日月於其端天子所建言常明也 交龍為旂旂倚也

畫作兩龍相依倚也通以赤色為之無文采諸侯所建也通帛為旃旃戰也戰戰恭已而已也三孤所建象無事也熊虎為旗軍將所建象其猛如虎與衆期其下也烏隼為旗旗譽也軍吏所建急疾趨事則有稱譽也雜帛為旒以雜色綴其邊為趨尾也將帥所建象物雜也龜蛇為旐旐兆也龜知氣兆之吉凶建之於後察度事宜之形兆也金羽為旛旛猶滑也順滑之貌也析雨為旌旌精也有精光也綏有虞氏之

旌也注旌竿首其形纍纍然也 綏夏后氏之旌也其
形衰衰也 白旆殷旌也以帛繼旒末也 翺陶也其
貌陶陶下垂也 幢童也其貌童童也 旛幡也其貌
幡幡也 校號也將帥號令之所在也 節為號令賞
罰之節也 鐸度也號令之限度也 金鼓金禁也為
進退之禁也 戚威也斧以斬斷見者皆威懼也 鉦
謠也所向莫敢當前謠然破散也

釋車

車古者曰車聲如居言行所以居人也今日車車舍也
行者所處若車舍也 天子所乘曰玉輅以玉飾車也
輅亦車也謂之輅者言行於道路也象輅金輅木輅各
隨所以為飾名之也 鈎車以行為陣鈎股曲直有正
夏所制也 胡車車車胡以罪沒入為官奴者引之殷所
制也 元戎車在軍前啟突敵陣周所制也 輦車人
所輦也 柏車柏伯也大也丁夫服任之小車也 羊
車羊祥也祥善也善飾之車今犢車是也 墨車漆之

正黑無文飾大夫所乘也 重較其較重鄉所乘也

役車給役之車也 棧車棧靖也麻靖物之車也皆庶

人所乘也 輶車容者所乘也 容車婦人所載小車

也其蓋施帷所以隱蔽其形容也 衣車前戶所以載

衣服之車也 獵車所乘以畋獵也 小車駕馬輕小

之車也駕馬宜輕使之局小也 高車其蓋高立載之

車也 安車蓋卑坐乘今吏之乘小車也 羸車羸車

各以所駕名之也 檻車上施欄檻以格猛獸之車也

輶車輶遙也遠也四向遠望之車也輶車載輶重

卧息其中之車也輶廁也所載衣物雜廁其中也輶

車輶屏也四面屏蔽婦人所乘牛馬也輶輶之形同有

邸曰輶無邸曰輶輶句也輶上句也衡橫也橫馬

頸上也游環在服馬背上駉馬之外轡貫之游移前

却無常處也脇驅在服馬外脇也陰陰也橫側車

前以陰答也輶所以引車也鍍金塗沃也冶白金以

沃灌鞮環也續續鞮端也文鞮車中所坐者也用虎

皮有文采因與下舉相連著也 鞅伏也在前人所伏

也 軾式也所伏以式敬者也 乾韉車中重薦也輕

乾韉小貂也 轂塙也體堅塙也 轅援也車之大援

也 枕橫在前如卧牀之有枕也枕橫也橫在下也

薦板在上如薦席也齊人謂車枕以前曰縮言局縮也

竟冀曰育御者坐中執御育然也 較在箱上為辜

較也 立人象人立也或曰陽門在前曰陽兩旁似門

也 楅𣵀也所以扼牛頸也馬曰烏啄下向又馬頸似

鳥開口向下啄物時也 隆強言體隆而強也或曰車

弓似弓曲也其上竹曰郎疏相遠晶晶然也 輻復也

重複非一言之也 輞罔也罔羅周輪之外也關西曰

輶言曲輶也或曰輶輶縣也縣連其外也 輪綸也言

彌綸也周匝之言也 輶言輻輶入轂中也 輿舉也

軸抽也入轂中可抽出也 釭空也其中空也 鑄

間也間釭軸之間使不相摩也 轄害也車之禁害也

輶裏也裏輶頭也 輶指也如指而見於轂頭也

簠橫也在車前織竹作之孔簠簠蓋在上覆蓋人也

輦藩也蔽水雨也 輦蓋又也如屋構橑也 杠公也

衆人所公共也 輦輓猶秘鑿也在車軸上正輪之秘

齒前却也 履似人履也又曰伏兔在軸上似之也又

曰輶輶伏也伏於軸上也 鈎心從輿心下鈎軸也

縛在車下與輿相連縛也 棠蹠也在車兩旁蹠使

不得進却也 幪憲也禦熱也 紲制也牽制之也

紛放也防其放弛以拘之也 轡呷也牽引呷戾以制

馬也 勒絡也絡其頭而引之也 銜在口中之言也

鑣苞也所以在旁苞歛其口也 鞅嬰也喉下稱嬰

言纓絡之也其下飾曰樊纓其形樊樊而上屬纓也

鞅經也橫經其腹下也 鞅半也拘使半行不得自縱

也 鞅檢也所以檢持制之也 鞅疆也繫之使不得

出疆限也 鞅道也在後道迫不得使却縮也 負在

背上之言也 鞅懸也所以懸縛軌也

釋船

船循也循水而行也又曰舟言周流也其前立柱曰櫂
根魏也魏魏高貌也其尾曰柂柂也後見柂曳也
且弼正船使順流不使他疾也在旁曰櫓櫓膂也用
膂力然後舟行也引舟者曰竿竿作也作起也起舟
使動行也在旁撥水曰櫂櫂濯也濯於水中也且言
使舟權進也又謂之札形似札也又謂之楫楫捷也撥
水使舟捷疾也所用斥旁岸曰交一人前一人還相交
錯也帆泛也隨風張幔曰帆使舟疾汎汎然也舟

中牀以薦物者曰簀言但有簀如簀牀也南方人謂之
簀寢言濕漏之水寢然從下過也 其上板曰覆言所
覆衆枕也其上屋曰廬象廬舍也其上重室曰飛廬在
上故曰飛也又在上曰爵室於中候望之如鳥雀之警
示也軍行在前曰先登登之向敵陣也 狹而長曰艤
衝以衝突敵船也 輕疾者曰赤馬舟其體正赤疾如
馬也 上下重牀曰艦四方施板以禦矢石其內如牢
艦也 五百斛以上還有小屋曰斥候以視敵進退也

三百斛曰艚艚船也船短也江南所名短而廣安不
傾危者也二百斛以下曰艇其形徑挺一人二人所
行也

釋名卷七

欽定四庫全書

釋名卷八

漢 劉熙 撰

釋疾病

疾病者客氣中人疾急也病並也並與正氣在膚體中也
疹診也有結氣可得診見也 疚久也在體中也
痛通也通在膚脉中也 癢揚也其氣在皮中欲得
發揚使人搔發之而揚出也 眩懸也目視動亂如懸

物遙遙然不定也

歷漚漚從耳鼻中出歷歷然也

禿無髮沐禿也髡頭生創曰痂髡亦然也 盲茫也茫

茫無所見也 瞽鼓也瞑瞑然目平合如鼓皮也 矇

有眸子而失明蒙蒙無所別也 眴縮壞也 瞎迄也

膚幕迄迫也 眸子明而不正曰通視言通達目匡一

方也又謂之麗視麗離也言一目視天一目視地目明

分離所視不同也 目匡臨急曰眴眴小也目眇傷赤

曰眦眦末也創在目兩末也 目生膚入眸子曰浸浸

侵也言侵明也亦言浸淫轉大也 聾龍也如在蒙籠

之內聽不察也 鼻塞曰𦐇𦐇久也涕久不通遂至窒

塞也 齟朽也蟲齧之齒缺朽也 瘖啞然無聲也

癭嬰也在頸嬰喉也 癰喉氣著喉中不通積成癰也

消瀝瀝渴也腎氣不周於胃胃中津潤消渴故欲得

水也 嘔偃也將有所吐脊曲偃也 欬刻也氣奔至

出入不平調若刻物也 喘湍也湍疾也氣出入湍疾

也 吐瀉也故揚豫以東謂吐為瀉也 乳癰曰妬妬

褚也氣積褚不通至腫潰也 心痛曰疝疝訛也氣訛
訛然上而痛也 臍否也氣否結也 小兒氣結曰哺
哺露也哺而寒露乳食不消生此疾也 注病一人死
一人復得氣相灌注也 泄利言其出漏泄而利也下
重而赤白曰膿言厲膿而難也 陰腫曰墮氣下墮也
又曰疝亦言訛也訛訛引小腹急痛也 疼卑氣疼疼
然煩也 痔食也蟲食之也 酸遜也遜遁在後也言
脚疼力少行遁在後以遜遁者也 消弱也如見害削

筋力弱也

懈解也骨節解緩也

厥逆氣從下厥起

上行入心脇也

瘡酷虐也凡疾或寒或熱耳而此疾

先寒後熱兩疾似酷虐者也

疥斷也瘡搔之齒顫斷

也

癬徙也浸淫移徙處日廣也故青徐謂癬為徙也

胗展也瘡搔之捷展起也

腫鍾也寒熱氣所鍾聚

也

癰壅也氣壅結裏而潰也

痲慄也小便難慄慄

然也

創戕也戕毀體使傷也

瘕侈也侈開皮肉為

創也

癰漫也生漫故皮也

痕根也急相根引也

瘤流也血流聚所生瘤腫也贅屬也橫生一肉屬著體也肱丘也出皮上聚高如地之有丘也

釋喪制

人始氣絕曰死死漸也就消漸也士曰不祿不復食祿也大夫曰卒言卒竟也諸侯曰薨薨壞之聲也天子曰崩崩壞之形也崩礧聲也殯翳也就隱翳也徂落徂祚也福祉殞落也徂亦往也言往去落也罪人曰殺殺竈也埋竈之使不復見也罪及餘人曰

誅誅株也如株木根枝葉盡落也 死於水者曰溺溺
弱也不能自勝之言也 死於火者曰燒燒焦也 戰
死曰兵言死為兵所傷也 下殺上曰弑弑伺也伺間
而後得施也 懸繩曰縊縊阨也阨其頸也 屈頸閉
氣曰雉經如雉之為也 獄死曰考竟考得其情竟其
命於獄也 市死曰棄市市衆所聚言與衆人共棄之
也 斫頭曰斬斬腰曰腰斬斬誓也誓加兵即斷也
車裂曰轅轅散也肢體分散也 煮之於鑊曰烹若烹

禽獸之肉也

槌而死曰掠掠狼也用威大暴於豺狼

也老死曰壽終壽久也終盡也生已久遠氣終盡也

少壯而死曰夭如取物中夭折也未二十而死曰

殤殤傷也可哀傷也父死曰考考成也亦言槁也槁

於義為成凡五材膠漆陶冶皮革乾槁乃成也母死

曰妣妣比也比之於父亦然也漢以來謂死為物故

言其諸物皆就朽故也既定死曰尸尸舒也骨節解舒

不復皆自勝斂也衣尸曰襲襲匝也以衣周匝覆衣

之也 以囊韜其形曰冒覆其形使人勿惡也 已衣
所以束之曰絞衿絞定也交結之也衿禁也禁繫之也
含以珠貝含其口中也 握以物著尸手中使握之
也 衣尸棺曰歛歛藏不復見也 棺闕也關閉也
槨廓也廓落在表之言也 尸已在棺曰柩柩究也送
終隨身之制皆究備也 於西壁下塗之曰殯殯賓也
賓客遇之言稍遠也塗曰攢攢木於上而塗之也 三
日不生生者成服曰縗縗推也言傷摧也 經實也傷


擢之實也 絞帶絞麻總為帶也三年之縗曰斬不緝
其末直剪斬而已期曰齋齋齊也 九月曰大功其布
如麤大之功不善治練之也 小功精細之功小有飾
也 總麻總絲也績麻總如絲也 錫縗錫治也治其
麻使滑易也 凝凝也凝於吉也 總細如總也 䟽
䟽如總也 環經未無於散麻圓如環也 弁經如爵
弁而素如經也 重死者之資重也含餘米以為粥投
之甕而懸之比葬未作主權以重主其神也 葬藏也

壙曠也藏於空曠處也 輿棺之車曰輶輶耳也懸
於左右前後銅魚搖絞之屬耳耳然也 其蓋曰柳柳
聚也衆飾所聚亦其形像也亦曰鼈甲以鼈甲亦然也
其旁曰牆似屋牆也 翬齊人謂扇為翬此似之也象
翬扇為清涼也翬有黼有畫各以其飾名之也兩旁引
之曰披披擺也各於一旁引擺之備傾倚也 從前引
之曰緋緋發也發車使前也 懸下壙曰綈綈將也徐
徐將下之也棺束曰緘緘函也古者棺不釘也旁際曰

小要其要約小也又謂之衽衽士也任制際會使不解也 送死之器曰明器神明之器異於人也 塗車以泥塗為車也 芻靈束草為人馬靈名之也 喪祭曰奠奠停也言停久也亦言樸奠合體用之也 朔望祭曰殷奠所用殷衆也 既葬還祭於殯宮曰虞謂虞樂安神使還此也 又祭曰卒哭卒止也止孝子無時之哭朝夕而已也 又祭曰祔祭於祖廟以後死孫祔於祖也 期而小祥亦祭名也孝子除首經服練冠也祥

善也加小善之飾也 又期而大祥亦祭名也孝子除
纁服服朝服縞冠加大善之飾也 間月而禫亦祭名
也孝子之意澹然哀思益衰也 冢腫也象山頂之高
腫起也 墓慕也孝子思慕之處也 丘象丘形也陵
亦然也 假葬於道側曰埵埵翳也 日月未滿而葬
曰渴言謂欲速葬無恩也 過時而不葬曰慢謂慢傲
不念早安神也 葬不如禮曰埋埋瘞也趨使葬腐而
已也 不得埋之曰棄謂棄之於野也 不得停尸曰

損損於地邊者也



釋名卷八